

- प्रदेश मांय तैय बगत ऊं सात दिन पैली चौमासा री बिरखा सरु व्ही।
- मुख्यमंत्री भजन लाल शर्मा जनता ऊं चौमासा मांय पाणी भेळो करण माथे खास ध्यान देवण अर हरियाळो राजस्थान अभियान मांय सिरकत करण री अपील कीनी।
- प्रधानमंत्री नरेन्द्र मोदी कह्यो- पाकिस्तान सागे न्यारा-न्यारा मुद्दा सुलझावण सारु भारत ने किण ई तीजा पख री मध्यस्थता मंजूर नी है।
- देश मांय 77 करोड़ रहवासियां री आयुष्मान भारत स्वास्थ खाता यानि आभा आईडी बणायी ज्यी।

000

प्रदेश रा कुछ हलकां मांय तैय बगत ऊं करीब सात दिन पैली आज चौमासा री बिरखा सरु व्हे गयी। मौसम केन्द्र जयपुर राज्य मांय घणखर ठौड़ा आवता दो-तीन दिन मांय मेह व्हेवण रा आसार जताया है। मौसम विभाग रा जयपुर केन्द्र रा निदेशक राधेश्याम शर्मा राज्य मांय घण-खर ठौड़ा आवता दो-तीन दिन मांय मेह व्हेवण री संभावना जतायी है।

चौमासा री बिरखा सरु व्हेवण सागे ई पाली, सीकर, अलवर, टोंक, जालौर, जोधपुर, जयपुर अर आरे-सारे रा हलकां मांय आज गरज सागे मेह व्हेवण अर ज़ोरदार बायरो बाजण सारु चेतायी ज्यो है। 14 जिलां मांय बारिश रो यलो अलर्ट जारी करी ज्यो है। ई बीचे कोटा अर चूरु मांय व्ही रिमझिम बारिश ऊं गर्मी ऊं साता मिली।

मुख्यमंत्री भजन लाल शर्मा चौमासा मांय लोगां ऊं पाणी भेळो करण बाबत् खास ध्यान देवण बाबत् कह्यो है। वे आज राजसमंद रा भिक्षु निलयम परिसर मांय वंदे गंगा जल संरक्षण जन अभियान रा तैत राख्यी ज्या जळसा मांय बोल रह्या हा। मुख्यमंत्री कह्यो के सब जणां रे मिल र पाणी बचावण ऊं प्रदेश मांय ज़मीं हेटे पाणी रो लेवल ऊंचो आवेला। वे पाणी बचावण सागे हरियाळो राजस्थान अभियान मांय ई प्रदेश री जनता ऊं योगदान देवण बाबत् कह्यो। श्री शर्मा राजसमंद झील कने पौधा ई रोप्या। ई पाछे मुख्यमंत्री जालौर जिला रा सांचौर मांय नमर्देश्वर घाट माथे राख्यी ज्यां कार्यक्रम मांय ओजू कह्यो के पाणी बचावण माथे सरकार रो खास ध्यान है।

अभियान रा तैत प्रदेशभर मांय पाणी बचावण सारु जाग जागावण रा कार्यक्रम राख्या जा रह्या है। ई सागे ई कूड़ा-बावड़ियां री साफ़-सफ़ाई अर मरम्मत रा काम ई कर्या जा रह्या है।

सलूमबर मांय सोनार माता मंदिर परिसर मांय श्रमदान रो कार्यक्रम राख्यी ज्यो, जिण मांय जिला कलेक्टर समेत मोकळा लोग 200 किलोग्राम ऊं बत्तो कचरो हटायी ज्यो। भीलवाड़ा मांय पशुपालन मंत्री जोराराम कुमावत जल पूजन कर र पौधा रोप्या। झुन्झुनू रा बीड़ हलका री लवकुश वाटिका मांय पौधा रोपी ज्या।

विकसित कृषि संकल्प अभियान रा तहत देश रा एक लाख 43 हजार गांवां रा 13 करोड़ 4 लाख किसानां ने सीधा तौर ऊं जोड़ी ज्या है। केन्द्रीय कृषि मंत्री शिवराज सिंह चौहान आज नई दिल्ली मांय खबरनवीसां ने आ जाणकारी दीनी। वे बतायो के अभियान रा तहत 60 हजार ऊं बत्ता कार्यक्रम राख्यी ज्या। अभियान रा तैत आदिवासी हलकां रा जिलां माथे खास ध्यान दियो ज्यो। कृषि मंत्री कह्यो के विकसित कृषि संकल्प अभियान रो खास मकसद जमीं अर प्रयोगशालावां बीचे दूरी खत्म करणो है। श्री चौहान कह्यो के ई दौरान किसान वां री भांत-भांत री परेशानियां बतायी। ई सागे ही खेती-बाड़ी रा हलका मांय नुवा कामां रो दरसाव ई करी ज्यो। वे किसानां ने हर संभव मदद रो भरोसो दिरायो। कृषि मंत्री कह्यो के किसानां री आमदनी बधावण अर भारत ने दुनिया री उपज रो मोटो हिस्सो भारत मांय उपजावण माथे सरकार रो खास ध्यान है।

सरकार गैर-सरकारी गाड़ियां सारू फास्टैग आधारित सालाना पास री सरूआत करण री योजना बणा रही है। ई साल 15 अगस्त ऊं सरू व्हेवण वाळा ई पास री कीमत तीन हजार रुपया व्हेला। सड़क परिवहन अर राजमार्ग मंत्री नितिन गडकरी सोशल मीडिया पोस्ट रे जरिये आ जाणकारी दीनी। इण ऊं देशभर मांय नेशनल हाईवे माथे किफायती सफर व्हे सकेला। अ पास लागू व्हेवण री तारीख ऊं एक साल या 200 यात्रावां सारू मान्यो जावेला।

राज्यपाल हरिभाऊ बागडे आज झालावाड़ मांय जिला रा अहलकारां सागे मीटिंग कर र जनता रा भला री न्यारी-न्यारी योजनावां रा काम रो जायजो लीनो। राज्यपाल अहलकारां ने आं योजनावां रो जरूरी प्रसार-प्रचार करण अर बत्ता ऊं बत्ता लोगां ने आं री जाणकारी देवण रा हुकम दीना। राज्यपाल झालरापाटन रा जैविक खेती उत्कृष्टता केन्द्र मांय लगायी ज्यी प्रदर्शनी ई देखी अर किसानां सागे बातचीत कीनी।

प्रधानमंत्री नरेन्द्र मोदी आज अमेरिका रा राष्ट्रपति डॉनल्ड ट्रम्प ने ज़ोर दे र कह्यो है के पाकिस्तान सागे मसला सुलझावण मांय भारत कदे ई तीजा पख री मध्यस्थता मंजूर नी कीनी है अर आगे ई नी करेला। विदेश सचिव विक्रम मिसरी आ जाणकारी देता थकां बतायो के प्रधानमंत्री मोदी राष्ट्रपति ट्रंप सागे फोन रे जरिये बातचीत कीनी। ई दौरान दोन्यू नेता ऑपरेशन सिन्दूर रा बारा मांय ई चर्चा कीनी।

श्री मोदी ओजू कह्यो के भारत पाकिस्तान रा कब्ज़ा वाळा कश्मीर मांय केवल आतंकी ठिकाणां ने ही निशाणो बणायो हो, ज्यीं दौरान भारत री कार्यवाही घणी सटीक ही। तीन देशां रा पांच दिन रा दौरा रा तैत प्रधानमंत्री मोदी आज कोएशिया पूग्या। भारत रा किण ई प्रधानमंत्री रो ओ पहलो कोएशिया दौरा है। इण ऊं पैली प्रधानमंत्री कनाडा रा कनानास्किस मांय व्ह्या जी-7 शिखर सम्मेलन रे दौरान कनाडा रा प्रधानमंत्री मार्क कार्नी सागे मीटिंग कीनी। विदेश सचिव बतायो के भारत अर कनाडा एक-दूजा रा उच्चायुक्तां री बहाली माथे सहमत व्हे गया है। दोन्यू नेतां आपस रिश्ता मजबूत बणावण अर एक-दूजा माथे भरोसो कायम करण रा बारा मांय ई चर्चा कीनी।

भारत डिजिटल स्वास्थ्य व्यवस्था बणावण ओड़ी तेजी ऊं आगे बढ़ रह्यो है। केंद्रीय स्वास्थ्य अर परिवार कल्याण राज्य मंत्री अनुप्रिया पटेल आकाशवाणी सागे खास बातचीत मांय बतायो के आयुष्मान भारत डिजिटल मिशन रे जरिए देश मांय हाल ताई 77 करोड़ रेहवासियां रा आयुष्मान भारत स्वास्थ्य खाता यानि ID* पहचान पत्र बणा दिया ज्या है।

11वों अन्तर्राष्ट्रीय योग दिवस मनावण सारू देश—दुनिया मांय मोटा पैमाना माथे तैयारियां करी जा रही है। ई साल योगा फॉर वन अर्थ—वन हैल्थ मुद्दा माथे मनाया जावण वाळा योग दिवस रा काउंटडाउन कार्यक्रम रा तैत केई दिनां ऊं सामूहिक योगाभ्यास, योग शिविर अर जागरूकता कार्यक्रम चाल रह्या है। प्रदेश मांय राख्या जा रह्या कार्यक्रमों री बानगी बाग—बगीचा, न्यारा—न्यारा संस्थानां, दफतरां, धार्मिक अर सैर—सपाटा री ठौड़ां निजर आ रही है। आं ठौड़ां 21 जून ने मनाया जावण वाळा अंतर्राष्ट्रीय योग दिवस रा काउंटडाउन कार्यक्रम राख्या जा रह्या है। आं मांय हर उम्र रा लोगां री भागीदारी निजर आ रही है। सरहदी जिला जैसलमेर रा रेतीले धोरां मांय अर सरहदी चौकियां माथे न्यारी—न्यारी योग मुद्रावां रो अभ्यास करता जवान मनोहारी नजारो पेश कर रह्या है। पाली अर अजमेर समेत न्यारी—न्यारी ठौड़ां भेळा योगाभ्यास सत्र अनुशासन अर एकजुटता रो संदेश दे रह्या है। भारत रो दुनिया ने ओ अनोखो उपहार योग, शांति अर भाईचारा रो आधार बण रह्यो है। क्षेत्रीय समाचार एकांश री ओर ऊं योग जागरूकता रा बारा मांय चलायी जा रही श्रृंखला मांय आज सुणो सा योग री सिखावण देवण वाळी मेघना सोती रो संदेश।

प्रधानमंत्री नरेन्द्र मोदी आकाशवाणी ऊं 29 जून दीतवार ने प्रसारित कर्या जावण वाळा खास कार्यक्रम मन की बात मांय विचार बतावेला। आ ई रेडियो कार्यक्रम री 123वीं कड़ी व्हेला। आप ई ई सारू मुफ्त नम्बर 1800—11—7800 माथे 27 जून ताई राय भेज सको हो। ई रे अलावा नरेन्द्र मोदी एप या माय जीओवी ओपन फोरम रे जरिए ई सुझाव भेज्या जा सके है।
